



MENTERI KANAN PERTAHANAN
MALAYSIA

KENYATAAN MEDIA

A. ANCAMAN MILITAN : MINDEF DAN ATM TINGKATKAN KESIAPSIAGAAN DI SABAH

1. Berhubung laporan yang ditulis oleh *South China Morning Post* mengenai dakwaan "Tentera Diraja Sulu" sedang merancang untuk menceroob Sabah, MINDEF dan ATM sememangnya memberi perhatian terhadap laporan berkenaan. Sebarang ancaman, sama ada boleh dipercayai atau tidak, mesti disahkan secara bebas dan dianggap serius.
2. Agensi perisikan dan keselamatan kita juga sudah mengambil maklum tentang perkara yang dilaporkan dan sedang dalam proses verifikasi dengan agensi-agensi sejawat mereka di Filipina dan serantau seperti yang dinyatakan oleh Ketua Polis Negara (IGP) dan *Commander* ESSCOM semalam. Bahagian Staf Perisikan Pertahanan (BSPP) ATM juga sentiasa memantau perkembangan yang sedang berlaku dan menilai indikator-indikator yang boleh menjejaskan keselamatan.
3. Saya telah dimaklumkan oleh pihak ATM bahawa melalui pelaksanaan operasi dan perisikan, tiada petunjuk ketara atau bukti kukuh atas laporan sepertimana yang dinyatakan setakat ini. Walaubagaimanapun, seperti yang turut ditegaskan oleh Panglima Angkatan Tentera dan IGP, tindakan segera akan diambil bagi meningkatkan kesiapsiagaan ke tahap tertinggi di Sabah.
4. Saya telah arahkan ketiga-tiga perkhidmatan melalui - Panglima Medan Timur (TDM) Lt Jen Dato Mardzuki bin Muhammad; Panglima Armada Timur (TLDM) Laksamana Madya Dato Sabri bin Zali; dan Panglima Wilayah Udara 2 (TUDM) Mej Jen Dato Shamsudin bin Kassim untuk memastikan ATM turut meningkatkan kesiapsiagaannya ke tahap paling tinggi di negeri berkenaan terutama di Pantai Timur Sabah.



MENTERI KANAN PERTAHANAN
MALAYSIA

KENYATAAN MEDIA

5. Setakat ini, di Laut Sulu dan Sulawesi yang juga merupakan laluan perairan antara Sabah dan Selatan Filipina, kita mempunyai inisiatif *Trilateral Cooperative Arrangement* (TCA) melibatkan kerjasama antara Malaysia, Indonesia dan Filipina demi memastikan laluan perairan itu sentiasa selamat.
6. Hubungan kerja saya dengan Menteri Pertahanan Indonesia, Prabowo Subianto dan Setiausaha Pertahanan Filipina, Delfin Lorenzana juga akrab dan kukuh. Kami sentiasa berkomunikasi antara satu sama lain mengenai perkara yang menjadi kebimbangan bersama terutama soal keselamatan.
7. Prabowo Subianto, Setiausaha Lorenzana dan saya telah bersetuju untuk melaksanakan semula Perbincangan Peringkat Menteri mengenai TCA dan kami merancang untuk bertemu pada Januari 2022 bagi kukuhkan lagi kerjasama antara angkatan tentera negara masing-masing di Laut Sulu dan Sulawesi.
8. Memelihara keamanan dan kesejahteraan Sabah sentiasa menjadi keutamaan tertinggi MINDEF. Walau apa jua ancaman dan cabaran sekalipun, saya dan kepimpinan MINDEF akan terus memastikan keselamatan Sabah tidak dikompromi dan kedaulatan negara tidak sewenang-wenangnya dinodai.

B. PERANCANGAN PASCA 100 HARI KEMENTERIAN PERTAHANAN

1. Sebentar tadi saya telah menghadiri Bengkel Perancangan 100 Hari Kementerian Pertahanan (MINDEF) seterusnya mendengar pembentangan terperinci daripada setiap kumpulan kerja berdasarkan Teras-Teras utama di MINDEF dan ATM.
2. Susulan itu, saya ingin memaklumkan bahawa perancangan dan hala tuju MINDEF bagi tahun 2022 akan bersandarkan kepada dua (2) fokus utama. Pertama, setiap dasar serta polisi di MINDEF dan ATM akan diselaraskan dalam memuktamadkan sesuatu inisiatif. Dasar-dasar ini termasuklah Kertas Putih Pertahanan, Strategi Ketenteraan Negara, Dimensi Keempat Angkatan Tentera Malaysia (4DMAF), Pelan Strategik MINDEF 2021-2025 serta tiga dokumen sokongan dibawahnya iaitu



MENTERI KANAN PERTAHANAN
MALAYSIA

KENYATAAN MEDIA

Dasar Industri Pertahanan dan Keselamatan Negara (DIPKN), Rangka Tindakan Kapasiti Pertahanan (RTKP) dan Pelan Pelaburan Pertahanan Negara (3PN).

3. Kedua, perancangan dan hala tuju MINDEF bagi tahun 2022 akan dinamakan sebagai Pelan Tindakan 2022 atau PT22. Di bawah PT22, terdapat lapan (8) Teras Utama. Teras-terras tersebut termasuklah:
 - i. Kesiagaan dan Keupayaan
 - ii. Kompetensi Pertahanan
 - iii. Kebajikan
 - iv. Kerjasama Awam-Tentera
 - v. Industri Pertahanan Nasional
 - vi. Kerjasama Pertahanan Antarabangsa
 - vii. Pemerkasaan Veteran ATM
 - viii. Kesiagaan Terhadap Krisis Berskala Besar
4. Teras 8 tersebut merupakan Teras baharu yang diwujudkan bertujuan meningkatkan penglibatan ATM dalam membantu usaha negara menangani krisis berskala besar seperti banjir dan ancaman penyakit. Teras ini akan berkuatkuasa serta merta mengambil kira musim tengkujuh yang biasa berlaku di penghujung tahun. Seperti kenyataan Panglima Angkatan Tentera baru-baru ini, buat masa ini semua formasi dan unit dilapangan dalam keadaan siap sedia dan akan diaktifkan bila-bila masa mengikut keadaan semasa.
5. Di bawah lapan (8) Teras ini, MINDEF dan ATM merancang untuk melaksanakan pelbagai inisiatif. Antara inisiatif-inisiatif utama termasuklah:
 - i. Melaksanakan pembinaan 5 poliklinik baharu menjelang tahun 2024 bagi menambah baik perkhidmatan kesihatan untuk anggota dan veteran ATM.



MENTERI KANAN PERTAHANAN
MALAYSIA

KENYATAAN MEDIA

- ii. Memperkasakan lagi inisiatif *Trilateral Cooperative Arrangement (TCA)* yang dilaksanakan bersama Indonesia dan Filipina sejak tahun 2017 demi memperkukuh kawalan keselamatan di Laut Sulu dan Sulawesi.
 - iii. Menambah *Specialist Outreach Clinic* di kawasan pendalaman bagi membolehkan lebih ramai rakyat mendapatkan rawatan kesihatan yang terbaik.
 - iv. Menyerahkan lebih banyak unit Rumah Keluarga Malaysia Angkatan Tentera (RKMAT) kepada anggota ATM yang terpilih di seluruh negara.
 - v. Kaedah sewaan seperti yang dilaksanakan Tentera Udara Diraja Malaysia (TUDM) untuk memanfaatkan Helikopter AW139 akan turut diperluaskan kepada Tentera Darat Malaysia (TDM) dan Tentera Laut Diraja Malaysia (TLDM).
 - vi. Berusaha memastikan kadar dividen Lembaga Tabung Angkatan Tentera (LTAT) memuaskan. Ini agenda peribadi saya untuk membela kebajikan anggota ATM terutama di era pandemik yang amat mencabar ini.
6. Secara keseluruhannya, MINDEF dan ATM telah mempunyai perancangan yang jelas untuk bergerak ke hadapan di tahun 2022 selepas berjaya mencapai KPI 100 hari pertama Aspirasi Keluarga Malaysia (AKM) peringkat Kementerian. InsyaAllah, MINDEF dan ATM akan maklumkan secara terperinci inisiatif-inisiatif yang bakal dilaksanakan tahun hadapan kepada umum dari semasa ke semasa.

YB DATO' SERI HISHAMUDDIN TUN HUSSEIN

MENTERI KANAN PERTAHANAN

10 DISEMBER 2021